

共同經課-1 以賽亞書六章一節～八節

1 當 O-se-a 王死 hit 年，我看見主坐 tī 高高 ê 寶座，伊 ê 衣服垂落滿殿。2 Tī 伊 ê 頂面有 se-láh 兵跟隨 teh khiā；各有六個翼，用兩個翼遮面，兩個翼遮腳，兩個翼 teh 飛。3 Chit-ê 唱，hit-ê 和，講，聖哉，聖哉，聖哉，萬軍 ê 耶和華；伊 ê 榮光充滿全地。4 門框因為唱和 ê 聲來振動；殿就有煙雲滿滿。5 Hit 時我講，我有災厄 ah，我滅無 lah；因為我是嘴唇無清氣 ê 人，koh tiàm tī 嘴唇無清氣 ê 百姓中；因為我目睷有看見王，萬軍 ê 耶和華。6 有一個 se-láh 兵飛來 oá 我，伊 ê 手 thèh 熱熱 ê 炭，是用火擒 tùi 壇頂 thèh 來 ê。7 將炭 hē tī 我 ê 嘴，講，看 ah，chit-ê hē tī 你 ê 嘴唇，你 ê 罪過就除去，你 ê 罪惡就赦免。8 我 koh 聽見主 ê 聲講，我 thang 差 chī-chūi ah？chī-chūi beh 爲阮去？我就講，我 tī-chia，thang 差我。

共同經課-2 詩篇二十九篇

1 大衛 ê 詩。1) 大權能 ê ê kiá" ah，lín tiòh 將榮光氣力歸 hō 耶和華，歸 hō 耶和華。2 Tiòh 將耶和華 ê 名所應該得 tiòh ê 榮光歸 hō 伊。用聖潔 ê 裝飾敬拜耶和華。3 耶和華 ê 聲 tī 水面；榮光 ê 上帝起雷；耶和華 tī choē-choē 水 ê 頂面。4 耶和華 ê 聲有大氣力；耶和華 ê 聲滿滿威嚴。5 耶和華 ê 聲 phah 折柏香樹；耶和華 phah 碎黎巴嫩 ê 柏香樹。6 伊亦 hō 伊 tiò 跳親像牛 á；Hō 黎巴嫩 kap Se-liàn tiò 跳親像野牛 ê kiá"。7 耶和華 ê 聲 hō 火燄分叉。8 耶和華 ê 聲振動曠野；耶和華振動 Ka-te-su ê 曠野。9 耶和華 ê 聲 hō 鹿母 kia"-tiòh，來生 kiá"；亦 hō 樹林 ê 樹葉 lak 光光；見若 tī 殿內 ê lóng 講，榮光。10 大水氾濫 ê 時，耶和華坐 teh 做王，耶和華坐 teh 做王，直到永遠。11 耶和華 beh 賞賜氣力 hō 伊 ê 百姓；耶和華 beh 用平安賜福伊 ê 百姓。

共同經課-3 羅馬書八章十二節～十七節

12 Án-ni 兄弟 ah，咱 m̄ 是欠肉體 ê 債，致到照肉體來活。13 因為 lín 若照肉體來活，就會死；若用神 phah 死身軀 ê 所做，就會活。14 凡若 hō 上帝 ê 神所 chhoā ê，是做上帝 ê kiá"。15 因為 lín m̄ 是受 tiòh 奴僕 ê 神，致到 koh 驚惶；就是受 tiòh 設立做 kiá" ê 神，tùi án-ni 咱叫講，阿爸，父 ah。16 聖神家已 kap 咱 ê 神 sa"-kap 干證咱做上帝 ê kiá"。17 既然做 kiá" 就做後嗣，就是做上帝 ê 後嗣，kap 基督同做後嗣；咱若 kap 伊同受苦，是 beh hō 咱 kap 伊同榮光。

共同經課-4 約翰福音三章一節～十七節

1 有一個法利賽人，名尼哥底某，是猶太人 ê 官；2 暝時來就近耶穌，對伊講，拉比，阮知你做先生，是 tùi 上帝來 ê；因為若 m̄ 是上帝 kap 伊 tī-teh，就無人能行你所行 chiah-ê 神蹟。3 耶穌應伊，講，我實實 kā 你講，人若無重頭生，就 boē 會看見上帝 ê 國。4 尼哥底某對伊講，人已經老，怎樣會重頭生？kiám 會 koh 入老母 ê 腹肚來生 mah？5 耶穌應講，我實實 kā 你講，人若無 tùi 水 tùi 聖神來生，就 boē 會入上帝 ê 國。6 Tùi 肉體生 ê 是肉體；tùi 神生 ê 是神。7 我講，Lín 的確 tiòh 重頭生，你莫得掠做奇怪。8 風 chhut-chāi 意思來吹，你聽見伊 ê 聲，m̄ 知伊 tùi tá-lòh 來，tá-lòh 去；見若 tùi 神生 ê 亦是 án-ni。9 尼哥底某應伊講，怎樣會 án-ni ah？10 耶穌應伊講，你做以色列 ê 先生，也 m̄ 知這 mah？11 我實實 kā 你講，阮是講阮所知 ê，干證阮所看見 ê；但是 lín m̄ 接納阮 ê 干證。12 我 kā lín 講地上 ê 事，lín 尙且 m̄ 信；若 kā lín 講天頂 ê 事，lín thài beh 信？13 無人 bat 上天；只有 tī 天裡 ê 人子，tùi 天降落 ê nā-tiā"。14 Koh 親像摩西舉起蛇 tī 曠野，人子亦的確 tiòh án-ni 受舉起；15 hō 見若信 ê 人 tiàm-tī 伊有永活。16 因為上帝將獨生 ê kiá" 賞賜世間，hō 見若信伊 ê 人 boē 沉淪，會得 tiòh 永活；伊疼世間到 án-ni。17 因為上帝差 Kiá" 入世間，m̄ 是 beh 審判世間；是 beh hō 世間對伊得 tiòh 救。